



**Äntwert vun der Madamm Justizministesch, Elisabeth Margue, op d'parlamentaresch Fro Nr. 1227  
vum 23. September 2024 vum honorabelen Deputéierten Dan Hardy**

**Fro 1 an 3**

D'Grondviraussetzung fir eng méi séier a méi effikass Justiz ass, datt den akute Personalmanntem an der Magistratur behuewe gëtt. Dofir ginn 194 nei Magistratposten geschafen.

D'Gesetz vum 24. Juli 2024 huet schonns 94 nei Magistratposten geschafen. Dobäi kommen nach zousätzlech 20 Posten fir Justizattachéen. E weidere Gesetzesprojet Nr. 8299B gesäit d'Schafen vun enger Reserve vun 100 zousätzlechen Magistratposten vir. Hei waarde mir aktuell op den Avis vum Staatsrot.

Et geet awer net duer fir nei Magistratposten ze schafen, mee et muss een och genuch a kompetent Leit fannen, fir déi oppe Posten besetzen ze kënnen. Dofir gesäit de Gesetzesprojet Nr. 8433 eng Reform vum Accès zur Magistratur am Kader vun enger Ännerung vun der Legislatioun iwwert d'Justizattachéen vir. Et geet drëms fir de Reservoir vun de Kandidaten fir d'Magistratur méi grouss ze maachen. De Gesetzesprojet Nr. 8433 ass nach net vum Staatsrot aviséiert ginn.

Zousätzlech zur Opstockung vun der Zuel vun de Magistraten, suerge mir dofir, datt och d'Grefe vun de Geriichter an d'Sekretariat vun de Parquete mat genuch administrativem Personal verstärkt ginn.

Dës Personalopstockunge wäerte mëttel- a laangfristeg zu enger Verkierzung vun de Gerichtsprozeduren féieren.

Gläichzäiteg ginn d'Projete fir d'Digitaliséierung vun der Justiz virugedriwwen. Dëst wäert et erméiglechen, fir vill Demarchen am Justizsystem méi einfach a séier ze maachen. Grad de verstärkten Asaz vu Kënschtlecher Intelligenz (KI) an der Justiz wäert an d'Zukunft eng wichteg Hëllef ginn, woubäi kloer ass, datt KI awer ni e Richter wäert ersetzen.

D'Regierung mécht och déi néideg Efforte fir déi grouss Retarde bei der Mobiliséierung vun den zousätzlechen néidegen Gebäilechkeeten fir d'Justizautoritéiten opzehuelen, well den aktuelle Manntem u Büroen a Geriichtssäll riskéiert soss eng negativ Auswierkung op d'Delaien ze hunn.

Dodernieft gi verschidde Gerichtsprozeduren moderniséiert. De Koalitiounsaccord 2023-2028 gesäit am Kader vum Code de procédure pénale zum Beispill eng acceleréiert Prozedur vir. D'Delaie wäerten awer och an d'Zukunft ëmmer vu ganz ënnerschiddlechen Facteuren ofhänken, wéi d'Komplexitéit vun der Affaire, d'Rekursméiglechkeeten an d'Strategie vun de Parteien an hiren Affekoten. Dowéinst ass et net méiglech fir pauschal Previsiounen ze maachen.



**Fro 2**

Generell ginn et ze wéineg Interessente fir eng Expertise am Kader vun enger Geriichtsprozedur duerchzeféieren. A verschiddenen Dossieren dauert et méi laang fir de passenden Expert ze fannen.

Lëtzebuerg, den 23. Oktober 2024.

D' Justizministesch

(s.) Elisabeth Margue